

Մեծահասակների կրթությունն անհրաժեշտություն է հասարակության զարգացման և բարգավաճման համար, այն կարևոր է սոցիալ-տնտեսական, քաղաքական և մշակութային փոփոխություններն ակտիվորեն վերահսկելու տեսանկյունից:

Իրանի համար կրթության համակարգի զարգացումն առաջնահերթություն է: Իրանի մեծահասակների կրթության ուսումնասիրությունը, խնդիրների վերհանումն անհրաժեշտ են իրանական հասարակության և կրթական համակարգի բարեփոխման ու զարգացման համար, ինչով էլ պայմանավորված է հետազոտության թեմայի արդիականությունը:

Ատենախոսությունը բաղկացած է ներածությունից, չորս գլխից, եզրակացություններից, օգտագործված գրականության ցանկից, հավելվածից: Այն ներառում է 26 աղյուսակ, 2 գծապատկեր: Ատենախոսության ընդհանուր ծավալը կազմում է համակարգչային 177 էջ:

Ատենախոսության առաջին՝ «*Իրանի կրթության համակարգը*» խորագրով գլխում, որն ունի չորս ենթագլուխ, Համիդոեզա Կամիարը դիտարկել է Իրանի կրթության համակարգի նպատակները և գործառույթները, զարգացման համառոտ պատմությունը, ներկայացրել է հանրակրթությունն ու բարձրագույն կրթությունն Իրանում: Իրանի կրթության համակարգի ընդհանուր նպատակները խմբավորվել են գաղափարախոսական, բարոյական, գիտակրթական, մշակութային և գեղարվեստական, հասարակական, էկոլոգիական, առողջապահական, քաղաքական, տնտեսական ուղղություններով, որոնք նկարագրվել են կրթության յուրաքանչյուր մակարդակում:

Ատենախոսության երկրորդ՝ «*Մեծահասակների կրթության առանձնահատկությունները*» խորագրով գլուխը բաղկացած է յոթ ենթագլխից, որտեղ հեղինակի կողմից քննվել և լուսաբանվել են մեծահասակների կրթության ոլորտի գլխավոր սահմանումները, վերլուծվել նրա հիմնարար սկզբունքները, գործառույթներն ու մոտեցումները: Այս գլխում հանգամանորեն ուսումնասիրվել է մեծահասակների կրթության վերաբերյալ տարբեր ձևակերպումներ, ներկայացվել են այս ոլորտին առնչվող ու լայն կիրառում ունեցող մի շարք եզրույթներ՝

«անդրագոգիկա», «ֆորմալ կրթություն», «ոչ ֆորմալ կրթություն», «շարունակական կրթություն» և «գրագիտություն կամ գրաճանաչություն»:

Ներկայումս մեծահասակների կրթությունը զարգացած և թույլ զարգացած երկրներում ունի տարբեր շեշտվածություն: Զարգացած երկրներում «մեծահասակների կրթություն» ասելով հիմնականում հասկանում են շարունակական և ցկյանս կրթությունը, գիտելիքահեն հասարակության ձևավորումը, մեծահասակների (հատկապես կանանց) կրթությունը: Թույլ զարգացած երկրներն ունեն աղքատության բարձր ցուցանիշ և չեն կարող ձեռնարկել ու իրականացնել մեծածախս ուսումնական ծրագրեր, այդ իսկ պատճառով իրագործում են կրթական այնպիսի ծրագրեր, որոնք ունեն համազգային, համապետական նշանակություն, ինչպես օրինակ՝ անգրագիտության կրճատումը:

Ատենախոսության երրորդ՝ «Մեծահասակների կրթության կազմակերպումն Իրանում» խորագրով գլխում, որը կազմված է վեց ենթազվիսից, ներկայացված են Իրանում գրագիտության և կրթության մակարդակի ընդհանուր պատկերը, մեծահասակների կրթության բնագավառում իրականացվող գլխավոր ծրագրերն ու քայլերը, առկա բացթողումներն ու խնդիրները, լուծման ուղիները: Այս գլխում մեկնաբանվել են գրաճանաչության և անգրագիտության մասին տարբեր ընկալումները, անգրագիտության տեսակները, համակարգչային գրագիտության անհրաժեշտությունը:

Այս գլխում դիտարկվել են Իրանում մեծահասակների կրթության և գրագիտության ոլորտի դժվարություններն ու մարտահրավերները երեք տեսանկյունից՝ կառուցվածքային, կառավարչական-ռազմավարական և միջավայրային գործոններ:

Ատենախոսության չորրորդ՝ «Հիմնախնդրի վերաբերյալ սոցիոլոգիական հարցումների արդյունքների վերլուծություն» խորագրով գլխում ներկայացված է հարցաթերթի միջոցով կատարված հետազոտությունը: Սոցիոլոգիական հարցմանը մասնակցել են Իրանի Խորասան Ռազավի նահանգի ուսումնական հաստատությունների տնօրեններ, ուսուցիչներ, բուհերի դասախոսներ, գրասենյակային աշխատողներ, մանկավարժական բուհերի ասպիրանտներ, ինչպես նաև գրագիտության դասընթացներում սովորողներ՝ աշխատավորներ:

Այս գլխում ներկայացված է սոցիոլոգիական հարցումների արդյունքների վերլուծությունը:

Ատենախոսության սեղմագիրը համապատասխանում է աշխատանքի բովանդակությանը, արտացոլում է նրա հիմնական դրույթները:

Ատենախոսն ունի 7 գիտական հոդված:

Հարկ ենք համարում նշել Համիդեզա Կամիարի ատենախոսական աշխատանքի արժեքավոր կողմերը.

✓ հեղինակի կողմից կատարվել է հիմնահարցի տեսական հիմքերի բազմակողմանի վերլուծություն,

✓ վերհանվել են և գնահատվել Իրանում մեծահասակների կրթության դժվարություններն ու մարտահրավերները,

✓ առաջարկվել են մեծահասակների կրթության բարելավման ուղիներ,

✓ իրականացվել են հիմնախնդրի վերաբերյալ սոցիոլոգիական հարցումներ:

Արժևորելով ատենախոսի կողմից կատարած գիտական աշխատանքը՝ հարկ ենք համարում ներկայացնել մի քանի նկատառում.

1. Ատենախոսության երկրորդ գլխի 2.3 ենթագլուխը վերնագրված է «Անդրագոգիկայի սահմանումը»: Կարծում ենք վերնագիրը կարելի էր այլ կերպ ձևակերպել:

2. Աշխատանքի համար նպատակահարմար կլիներ 2.5 և 2.6 ենթագլուխները միավորված ներկայացվեին:

3. Պաշտպանության ներկայացվող 2-րդ դրույթում նշվում են մեծահասակների կրթության ոլորտի թերությունները: Ենթադրվում է, որ հաջորդ դրույթում կնշվեն այն մոտեցումները, խնդիրները, գործոնները, որոնք կնպաստեն վերոնշված թերությունների վերացմանը և համակարգի արդյունավետության բարձրացմանը, սակայն ներկայացված դրույթը կրում է ընդհանրական բնույթ:

4. 6-րդ եզրակացությունը վերանայման և հստակեցման կարիք ունի:


5. Աշխատանքում կան լեզվական, համակարգչային բացթողումներ:

Եզրակացություն

Հետազոտության թեմայի արդիականությունը, նրա գիտական նորույթը, տեսական և գործնական նշանակությունը, ինչպես նաև ստացված արդյունքների հավաստիությունը և հիմնավորվածությունը թույլ են տալիս եզրակացնել, որ Համիդոեզա Կամիարի «Մեծահասակների կրթության հիմնախնդիրն Իրանի կրթության համակարգում» թեմայով ատենախոսությունն ինքնուրույն, ավարտուն գիտական աշխատանք է, ունի կարևոր տեսական և գիտական նշանակություն, համապատասխանում է ՀՀ գիտական աստիճանաշնորհման կանոնակարգի 7-րդ կետի պահանջներին և ԺԳ.00.01 - «Մանկավարժության տեսություն և պատմություն» մասնագիտական թվանիշին, իսկ ատենախոսն արժանի է հայցվող մանկավարժական գիտությունների թեկնածուի գիտական աստիճանին:

Մանկավարժության և հոգեբանության ամբիոնի վարիչ,

մ.գ.թ., դոցենտ՝



Լ.Գ. Բադդասարյան

Լ. Բադդասարյանի ստորագրությունը հաստատում եմ՝

ՎՊՀ-ի գիտարարող,



մ.գ.թ., դոցենտ՝



Ս.Ս. Բեժանյան